



**ՀԱՎԱՏԱՐՄԱԳՐՄԱՆ ՀԱՆՁՆԱԺՈՂՈՎ  
Ո Ր Ո Շ ՈՒ Մ**

17 մայիսի 2021 թ. N 46

**ՍՏԵՓԱՆԱՎԱՆԻ ՊՐՈՖԵՍՈՐ Ա. ՔԱԼԱՆԹԱՐԻ ԱՆՎԱՆ ՊԵՏԱԿԱՆ ԳՅՈՒՂԱՏՆՏԵՍԱԿԱՆ  
ՔՈԼԵԶԻ ԻՆՍՏԻՏՈՒՑԻՈՆԱԼ ԿԱՐՈՂՈՒԹՅՈՒՆՆԵՐԻ ՀԱՎԱՏԱՐՄԱԳՐՄԱՆ ՄԱՍԻՆ**

**Ընդհանուր տեղեկություն հաստատության մասին**

Հաստատության լրիվ անվանումը՝ «Ստեփանավանի պրոֆեսոր Ա. Քալանթարի անվան պետական գյուղատնտեսական քոլեջ» ՊՈԱԿ

Գործունեության հասցեն՝ ՀՀ, Լոռու մարզ, ք. Ստեփանավան, Երիտասարդական 47

Նախորդ հավատարմագրման մասին

որոշումը և ժամկետը՝ **չի ունեցել**

«Մասնագիտական կրթության որակի ապահովման ազգային կենտրոն» հիմնադրամի Հավատարմագրման հանձնաժողովը (այսուհետ՝ Հանձնաժողով), ղեկավարվելով ՀՀ կառավարության 2011 թվականի հունիսի 30-ի N 978-Ն որոշմամբ հաստատված «ՀՀ մասնագիտական կրթական ծրագրերի իրականացնող ուսումնական հաստատությունների և դրանց մասնագիտությունների պետական հավատարմագրման» կարգով, «ՀՀ մասնագիտական կրթության հավատարմագրման չափանիշները հաստատելու մասին» 2011 թվականի հունիսի 30-ի N 959-Ն որոշմամբ, «Մասնագիտական կրթության որակի ապահովման ազգային կենտրոն» հիմնադրամի (այսուհետ՝ ՈԱԿ) հավատարմագրման հանձնաժողովի ձևավորման և գործունեության ընթացակարգով և «Մասնագիտական կրթության որակի ապահովման ազգային կենտրոն» հիմնադրամի փորձագիտական խմբի ձևավորման կարգով, 24.12.20թ.-ի Հանձնաժողովի նիստում քննարկեց Ստեփանավանի պրոֆեսոր Ա. Քալանթարի անվան պետական գյուղատնտեսական քոլեջի (այսուհետ՝ ՄՈՒՀ, քոլեջ) ինստիտուցիոնալ կարողությունների հավատարմագրման հարցը:

**Հավատարմագրման գործընթացի հիմնական փուլերն իրականացվել են հետևյալ ժամկետներում.**

<b>դիմում-հայտի ներկայացում</b>	28 փետրվարի 2018
<b>ինքնավերլուծության ներկայացում</b>	3 հուլիսի 2018
<b>փորձագիտական այցի իրականացում</b>	14-16 հունվարի 2020
<b>փորձագիտական զեկույցի ներկայացում</b>	24 հունվարի 2020
<b>թերությունների վերացման ծրագրի ներկայացում</b>	27 փետրվարի 2020

Քոլեջի ինստիտուցիոնալ կարողությունների փորձաքննությունն իրականացրել է «Մասնագիտական կրթության որակի ապահովման ազգային կենտրոն» հիմնադրամի փորձագիտական խմբի ձևավորման կարգ»-ի պահանջներին համապատասխան ձևավորված անկախ փորձագետների խումբը: Գնահատումը կատարվել է ՀՀ կառավարության 2011 թվականի հունիսի 30-ի N 959-Ն որոշմամբ հաստատված ինստիտուցիոնալ հավատարմագրման 10 չափանիշներով:

Ինստիտուցիոնալ հավատարմագրման 10 չափանիշներից 5-ը՝ «**Կառավարում և վարչարարություն**», «**Հետազոտություն և զարգացում**», «**Ենթակառուցվածք և ռեսուրսներ**», «**Արտաքին կապեր և միջազգայնացում**» և «**Որակի ներքին ապահովման համակարգ**», գնահատվել են անբավարար:

Հանձնաժողովը, ուսումնասիրելով Ստեփանավանի պրոֆեսոր Ա.Քալանթարի անվան պետական գյուղատնտեսական քոլեջի կողմից ներկայացված ինստիտուցիոնալ կարողությունների ինքնավերլուծությունը, զեկույցի նախնական տարբերակի վերաբերյալ քոլեջի դիտողությունները և առաջարկությունները, փորձագիտական զեկույցը, զեկույցում նշված թերությունների վերացման գործողությունների ծրագիրը, լսելով քոլեջի փորձագիտական գնահատման վերաբերյալ Հանձնաժողովի նախագահի կողմից ընտրված երեք անդամների եզրակացությունները, որոնք ձևավորվել են փորձագիտական խմբի անդամների և ուսումնական հաստատության ներկայացուցիչների հետ հանդիպումների արդյունքում, ինչպես նաև Հանձնաժողովի անդամների դիտարկումներն ու առաջարկությունները, ամրագրեց հետևյալը.

**1. Առկա են խնդիրներ և ռիսկեր որակավորումների արժանահավատ շնորվման տեսանկյունից, սակայն առաջխաղացման միտումներ և օրինակներ առկա են:**

Քոլեջի բոլոր ՄԿԾ-ները մշակվել են լիազոր մարմնի կողմից հաստատված պետական կրթական չափորոշիչների հիման վրա, որոնք համապատասխանում են ՀՀ ՈԱՇ-ին: ՄՈՒՀ-ում իրականացվող ոչ բոլոր ՄԿԾ-ներն են ուղղակիորեն հարում քոլեջի գյուղատնտեսական ուղղվածությանը: Մարզի աշխատաշուկայի կարիքների համապարփակ վերլուծություններ քոլեջը դեռևս չի իրականացրել, այնուամենայնիվ քոլեջ-գործատու սերտ երկխոսության շնորհիվ կրթական ծրագրերը հնարավորինս համապատասխանեցվել են աշխատաշուկայի կարիքներին: Մոդուլային ուսումնական ծրագրերում նշված ակնկալվող արդյունքներում հաճախ գերակշռում են տեսական գիտելիքները, քան հմտություններն ու կարողությունները: Քոլեջը փորձեր է անում ներգրավել արտադրական փորձառություն ունեցող գործատու դասախոսների, որոնք նպաստում են պրակտիկ հմտությունների ձևավորմանը:

ՄՈՒՀ-ում թեև մշակված է «Դասավանդման և ուսումնառության մեթոդների ընտրության և արդիականացման քաղաքականություն», սակայն դասավանդման և ուսումնառության մեթոդները ոչ միշտ են փոխկապակցված պետական կրթական չափորոշիչներում սահմանված ակնկալող արդյունքներին: Քոլեջն ունի ուսանողների գիտելիքների գնահատման կարգ, սակայն դասախոսներից շատերը տեղյակ չեն դրանից, սահմանված չեն ամփոփիչ ատեստավորման քննության գնահատման համար հստակ չափանիշներ: Ընդհանուր առմամբ դասախոսական կազմն ունի վերջնարդյունքներին

համապատասխան դասավանդման, ուսումնառության և գնահատման մեթոդների ընտրության խնդիր, ինչը կարող է խոչընդոտել ուսումնառության արդյունքների ձեռքբերմանը:

Քոլեջն ունի ՊԴ կազմի կայունության ապահովման և երիտասարդացման կարիք:

Քոլեջի նյութատեխնիկական հագեցվածությունը շատ թույլ է, լսարանային և լաբորատոր ֆոնդը հնամաշ է և մեծ խոչընդոտ է մասնագետների պատրաստման հարցում:

**2. Կառավարումն ու որակի ապահովման համակարգերը ձևավորման փուլում են, սակայն առկա են զարգացման միտումներ և կառավարումը միտված է որակի բարելավմանը, որակավորումների արժանահավաք շնորհմանը**

Քոլեջն ունի առանձնահատուկ դերակատարում տարածաշրջանում և ծավալած գործունեությունը հիմնականում համահունչ է առաքելությանը: Այն ունի սահմանված ռազմավարություն և ռազմավարական խնդիրներ, սակայն արդյունքահեն կառավարման և ռազմավարական խնդիրների իրականացման, արդյունավետության գնահատման փորձառություն քոլեջը դեռևս չունի:

Քոլեջում կառավարումը հիմնականում իրավիճակային է. տվյալների հավաքագրման մեխանիզմներ կան, սակայն դրանց արդյունքները չեն կիրառվում նպատակային և չեն հանդիսանում աշխատանքների պլանավորման, ռազմավարական ծրագրերի մշակման կամ վերանայման հիմք: Տեղեկատվության հավաքագրման գործընթացները հիմնականում կրում են իրավիճակային բնույթ և կանոնակարգված չեն նախապես մշակված ընթացակարգերով: Որակի ապահովման համակարգը ձևավորման փուլում է:

**3. Միջազգայնացումն ու հեղափոխական/ստեղծագործական գործունեությունը բավարար չեն աջակցում որակավորումների արժանահավաք շնորհմանը**

ՄՈՒՀ-ն իր ՌԾ-ում չի սահմանել հետազոտական/ստեղծագործական ոլորտին և արտաքին կապերին վերաբերող որևէ նպատակ,: Քոլեջը չունի հետազոտական/ստեղծագործական գործունեության իրականացման և զարգացման քաղաքականություն, մեխանիզմներ և ընթացակարգեր: Քոլեջը որպես հետազոտական գործունեության և կրթական գործընթացի փոխկապակցվածության մեխանիզմ դիտարկում է ուսանողներին տրվող անհատական աշխատանքները, ռեֆերատները, գործնական առաջադրանքները, սակայն դրանցում հետազոտական բաղադրիչը շատ թույլ է արտահայտված:

Դասախոսներն իրենց դասավանդած մոդուլների շրջանակներում չեն իրականացնում հետազոտություններ, ինչը կարող է հանգեցնել առկա կադրերի մասնագիտական և մանկավարժական կարողությունների արդիականության կորստին և լճացմանը: ՄՈՒՀ-ում հետազոտական/ստեղծագործական գործունեություն ծավալելու համար բացակայում են համապատասխան ֆինանսական և լաբորատոր ռեսուրսները:

Քոլեջը չունի նաև արտաքին կապերի հաստատումը խրախուսող քաղաքականություն և ընթացակարգեր, ինչպես նաև այդ ոլորտի կանոնակարգմամբ զբաղվող ենթակառուցվածք: Այնուամենայնիվ, քոլեջն ակտիվորեն համագործակցում է որոշ տեղական կազմակերպությունների և սակավաթիվ միջազգային կազմակերպությունների հետ, որոնց հետ կապերի հաստատմամբ զբաղվում է Կարիերայի զարգացման և խորհրդատվության կենտրոնը:

Գործատուների հետ կապը հնարավորություն է ստեղծում գործատուների մոտ պրակտիկաների անցկացման, ուսանողների պրակտիկ հմտությունների ձևավորման, աշխատաշուկայի արդի

պահանջների վերաբերյալ քննարկումների կազմակերպման և կրթական ծրագրերի բարելավման համար:

4. Փորձագիտական զեկույցում նշված թերություններն առանցքային են որակավորումների արժանահավատ շնորհման տեսանկյունից, միաժամանակ հիմքեր ստեղծված են բարելավումների համար:

5. Փորձագիտական զեկույցում նշված թերությունների վերացման քոլեջի կողմից ներկայացված ծրագրի մեծ մասի իրականացումը ռիսկեր չի պարունակում: Ծրագրով սահմանված արդյունքների ձեռքբերումը կարող է նպաստել քոլեջի գործունեության տարբեր ոլորտներում առկա խնդիրների լուծմանը:

Ելնելով վերը նշվածից, Հավատարմագրման Հանձնաժողովը բաց քվեարկության արդյունքում

### ՈՐՈՇԵՑ

1. «Ստեփանավանի պրոֆեսոր Ա.Քալանթարի անվան պետական գյուղատնտեսական քոլեջ» ՊՈԱԿ-ին շնորհել պայմանական ինստիտուցիոնալ հավատարմագրում 2 /երկու/ տարի ժամկետով:
2. Հավատարմագրում շնորհելու որոշման հրապարակումից հետո՝ երկամյա ժամկետում ՈԱԿ-ին ներկայացնել փորձագիտական զեկույցում նշված թերությունների վերացման վերանայված ծրագիր և համապատասխան ժամանակացույց՝ հաշվի առնելով.
  - «Կառավարում և վարչարարություն», «Հետազոտություն և զարգացում», «Ենթակառուցվածք և ռեսուրսներ», «Արտաքին կապեր և միջազգայնացում» և «Որակի ներքին ապահովման համակարգ» ոլորտներում առկա խնդիրներին առաջնահերթ լուծում տալու անհրաժեշտությունը,
  - ՌԾ նպատակների իրականացման համար հստակ ժամանակացույց և արդյունքների ձեռքբերման գնահատման չափելի առանցքային ցուցիչներ ունենալու պահանջը,
  - երկարաժամկետ, միջնաժամկետ և կարճաժամկետ փոխկապակցված պլանավորման անհրաժեշտությունը,
  - հետազոտության ոլորտում քոլեջի հետաքրքրությունների հստակեցման անհրաժեշտությունը, կարևորելով տարածաշրջանի կարիքները և հետազոտության արդյունքների հնարավոր ապրանքայնացումը:
3. Հատուկ ուշադրություն դարձնել.
  - բոլոր կրթական ծրագրերը քոլեջի ուղղվածությանը համապատասխանեցմանը,
  - շրջանավարտների և գործատուների հետ կանոնակարգված և կայուն կապերի հաստատմանը,
  - դասախոսական կազմի մասնագիտական և մանկավարժական կարողությունների զարգացմանը,
  - ուսանողների և դասախոսների շրջանում ուսանողակենտրոն ուսուցման վերաբերյալ իրազեկվածության մակարդակի բարձրացմանը,
  - քոլեջի բոլոր գործընթացներում ՊԻԳԲ շրջափուլի կիրառումանը,
  - ուսանողների մոտ վերլուծական, ստեղծագործական և քննադատական կարողությունների զարգացմանը միտված ուսուցման կազմակերպմանը:
4. «ՀՀ մասնագիտական կրթական ծրագրեր իրականացնող ուսումնական հաստատությունների և դրանց մասնագիտությունների պետական հավատարմագրման կարգ»-ի 12-րդ կետի պահանջներին

5. համապատասխան 6 ամիսը մեկ անգամ ՈԱԱԿ-ին գրավոր զեկույց ներկայացնել իրականացված գործողությունների արդյունքների վերաբերյալ՝ գնահատելով ակադեմիայի գործունեության բարելավումը, նորարարություններն ու ձեռքբերումները:
6. Հանձնարարել ՈԱԱԿ-ին պարտադիր մշտադիտարկման ենթարկել Ստեփանավանի պրոֆեսոր Ա. Քալանթարի անվան պետական գյուղատնտեսական քոլեջի գործունեության արդյունավետությունն՝ ըստ առաջընթացի առանցքային ցուցիչների:

**Հավատարմագրման Հանձնաժողովի**

**նախագահ**

2021 թ. մայիսի 17

ք.Երևան



**Ա. Սարյան**